

# Vers il schoc tranter Barcelona e Madrid

Tge fa lura l'Europa?

DA GUIU SOBIELA-CAANITZ

■ **Il filosof catalan Josep Ramoneda i Molins (\*1949) fa part da la generaziun oriundamain marxista da 1968. Tant pli ston ins dar bada cur ch'el prenda posiziuns che s'avischinan al nazionalissem catalan.** Quai fa'l en connex cun la votaziun davart l'autodeterminaziun dal pajais: «No convocar el referèndum seria entès com una derrota. Cal esperar que ho impedeixin.» Uschia ses essai, intitulà: «Lligats pel referèndum» e publictà ils 27 da matg a la gassetta online «El País Catalunya» (Barcelona). Ils dus umans ch'el vesa «Lligats pel referèndum» èn ils schefs da las duas partidas oppostas en il conflict davart il futur da la Catalogna: Carles Puigdemont, president da la renga catalana, e Mariano Rajoy, primminister da la Spagna. Pertgè èni paradoxalmain «unids dal referèndum»?

## Ils limits da la Spagna

Il pli scort dals dus, tenor Ramoneda, è Puigdemont. Ses antecessur, president Artur Mas, leva far vuschar ils Catalans

davart l'indipendenza. Ma Puigdemont ha chapì ch'el n'era betg legitimà a proclamar ina Catalogna independenta perquai ch'el n'avev probablamain survegnì nagina maiortad en lez senn. Puigdemont pretendia pia ina votaziun populara davart l'autodeterminaziun, gist sco ch'ins ha gia fatg a Québec ed en Scozia; ma Rajoy la vul scumandar arbitraramain cun la forza dal stadi. «Sempre és lleig impedir votar» («Igl è adina trid d'impedir da vuschar»). «Artur Mas i Carles Puigdemont són els més interessats a portar la tensió el més lluny possible.» Rajoy po segir impedir il referèndum, ma il pievel vegn lur a reagir cun protests ed agitaziuns, betg mo en Catalogna, mabain era tar ils Bascs. Co reage-scha lura l'Europa? Ramoneda: «Catalunya és el 20% del PIB espanyol i el 25% de les exportacions (...). Espanya entraria en una situació complicada que podria fins i tot amenaçar l'euro. I Europa (...) podria pressionar per a un acord.» La Catalogna (7 396 991 olmas) è pli populada che stadis sco il Danemarc, la Finlanda u l'Irlanda.